



Kujifunza Kutoka kwa Mwalimu wa Mbinguni

Naye ataketi kama asafishaye fedha na kuitakasa, naye atawatakasa wana wa Lawi, atawasafisha kama dhahabu na fedha; nao watamtolea Bwana dhabihu katika haki. —**Malaki 3:3.**

Ufuatao ni mchakato wa utakaso na wa usafishaji, upaswao kutekelezwa na Bwana wa majeshi. Kazi inazijaribu sana roho, lakini ni kupitia mchakato huu tu ambapo takataka na uchafu unaochafua unaweza kuondolewa. Majaribu yetu yote ni muhimu ili kutuleta karibu na Baba yetu wa mbinguni, katika utii kwa mapenzi Yake, ili tumtolee Bwana sadaka katika haki. Mungu amempa kila mmoja wetu uwezo, talanta za kuboresha. Tunahitaji uzoefu mpya na hai katika maisha matakatifu, ili tuweze kuyafanya mapenzi ya Mungu. Hakuna kiasi cha uzoefu wa zamani kitakachotosha kwa ajili ya wakati uliopo, au kututia nguvu kushinda magumu katika njia yetu. Ni lazima tupate neema mpya na nguvu mpya kila siku ili kuwa washindi.

Katika Nyanja zote, ni nadra sana sisi kubaki katika hali moja mara mbili. Kila mmoja ana uzoefu wake mwenyewe wa pekee katika tabia na hali yake, ili kukamilisha kazi fulani. Mungu anayo kazi na kusudi, katika maisha na kila mmoja na kwetu sote. Kila tendo, hata liwe dogo, lina mahali pake katika uzoefu wa maisha yetu. Lazima tuwe na nuru na uzoefu endelevu unaotoka kwa Mungu. Wote tunavihitaji, na Mungu yu zaidi ya tayari kwamba tuweze kuwa navyo, ikiwa tutavichukua. Bado hajafunga madirisha ya mbinguni kwa maombi yetu, lakini kuna wale ambao wamejisikia kutosheka na kuendelea bila msaada wa Mungu wanaohitaji sana....

Tunahitaji kujifunza kutoka kwa Mwalimu wa mbinguni kwa sasa kama ambavyo imekuwa wakati mwingine wowote maishani mwetu. Na kadiri tunavyopata uzoefu zaidi, kadiri tunavyosogea kuielekea nuru safi ya mbinguni, ndivyo tutakavyotambua zaidi ndani yetu kwamba tunahitaji kufanya matengenezo. Wote tunaweza kufanya kazi nzuri katika kuwabariki wengine, ikiwa tutaomba ushauri wa Mungu, na kuufuata katika utii na imani. Njia ya mwenye haki ni endelevu, kutoka nguvu hata nguvu, neema hata neema, na kutoka utukufu hata utukufu. Nuru ya Mungu itaongezeka zaidi na zaidi, kulingana na kusonga kwetu mbele, na kutufanya tustahili kukabili majukumu na dharura zilizo mbele yetu.

Utawu wa kweli unaenea na unaojieleza. Mtunga zaburi anasema, “Sikusitiri haki yako moyoni mwangu; Nimetangaza uaminifu wako na wokovu wako. Sikuficha fadhili zako wala kweli yako Katika kusanyiko kubwa” (Zaburi 40:10). Popote palipo na upendo wa Mungu, wakati wote kunakuwa na shauku ya kuuonesha. Ni vigumu kwetu kujisalimisha kwenye usulubishaji wa nafsi....

Tunaweza tukawa tumeongoka na kubadilishwa kweli kweli, na kuwa watoto wa Mungu kabisa, tukifurahia si ujuzi wa mapenzi Yake tu, bali tukiwaongoza wengine kwa mfano wetu, katika njia ile ile ya utii na kujisalimisha kwa unyenyekevu (The Review and Herald, Juni 22, 1886).